

戴靖教匪迹編  
卷卷  
五四

風陵文庫

文庫19

F 37

2


二

35

40

45

50



戡靖教匪述編卷四蜀述



石香村居士編輯

四年正月、尙書惠副都統德副都統額擒賊首冉文儔、通江藍  
號賊首冉文儔與羅其清同起事、其清敗、文儔聚通江脂麻  
壩地勢險峻、分築寨門、外設木城、三尙書惠等於上年除夜  
逼寨下營、斷其樵汲路、是夕丙夜、賊分三路出、官兵設伏擊  
退、且日乘賊弛備、副都統德副都統額攻其東、尙書惠攻西  
門、朱射斗阿穆勒塔入其南寨、賊分拒甚力、移時游擊段逢  
春、何勝華、外委蔣芳、董榮、李、大盈等戰死、官兵將不支、而賊

帥冉文偉執旗奮出吉林甲兵德楞額川北鎮兵陳在朝李  
正瓏鄉勇周應瓏躍入賊陣擒之而出賊遂大潰斬冉大元  
及賊目苟子雨等 奏至

上諭惠齡等前次拏獲羅其清曾將出力員弁開單具奏因何珙  
諸事專擅賞格不行著惠齡等將前次原奏出力人員名單遇  
報再行進呈又近來各路領兵大員皆以專擒首逆爲事竟置  
餘匪於不問是以王三槐羅其清拏獲後餘黨仍四出焚掠未  
見廓清又聞各路勦賊名爲繞截其實畏賊遠避民間有賊至  
兵無影兵來賊沒蹤可憐兵與賊何日得相逢之語又聞有賊

來不見官兵面賊去官兵纔出現一語又

御製詩注比年以來齊王氏王三槐等雖先後殲擒而各路賊匪  
尙衆延喘稽誅已及三載固由領兵諸將吳懦無能亦由將權  
不一互相推諉迄無成功今特命勒保爲五省經畧額勒登保  
明亮爲叅贊赦其從前稽緩之罪以責後效

上以勒保爲經畧大臣節制川陝甘楚豫五省軍務藍翎侍衛永  
保齎經畧印馳驛來川卽在領隊侍衛上行走副都統銜明  
亮額勒登保均授副都統爲叅贊大臣分路帶兵尙書惠齡  
丁憂回京守制陝甘總督宜綿 召還侍郎英善 賜

四品頂戴駐藏辦事四川省糧餉專交副都統銜福寧管理時  
川省素嘗團練鄉民各能自衛通飭原省倣照辦理餘賊屯  
忠州者官兵與戰於花橋子失利成都守備王大勇松潘外  
委張秀峩邊把總陳紹先死之賊穿州掠縣竄至涪州往年  
徐添德等擾梁山墊江遂至長壽涪州因團練之說起鄉民  
各聚其鄰多或千人少亦數百不等推衿耆有才識者爲首  
警則鳴鉦相聚分派守隘大眾萃於一山壘土石爲垣老弱  
處其中強壯扼於門執扁杆鋤鐮爲衝鋒器賊一大呼靡不  
聚而殄旃涪州民譚景東等初集千餘人保鶴游坪賊至禦

却之至是坪破景東受七十傷而死生監義民共六七百人  
俱死婦女倉皇陟險竄幽進寸退尺賊視其老少而殺擄焉  
或偪之江千擲洪濤巨浪中飄忽而去無算也賊犯江北廳  
至靜觀場有鄭錦堂者以硃塗兩手謂其子曰吾往說賊萬  
一或聽如殺我當驗吾手以認屍賊殺之壁山舉人劉國輔  
等督鄉勇禦之遂去其時賊分布州縣包正洪黨率醜類突  
至廣安州而冷天祿王光祖亦流轉而至欲合竄渡渠河西  
寧總兵楊遇春追及揮衆而前殺千五百人擒賊目嚴大林  
等七十人賊走捲碕橋仁市舖勢復張遇春繞出其前又大

敗之擒斬無算，賊遁渠縣黃土坎，計窮無所復之。羣相恐以楊鬍子再至，則惟有死而已。卽楊遇春也。遇春年四十而美髯垂胸，故賊以鬍子呼之。遣總兵朱射斗移稱賊首蕭占，懼張長庚自閬中趨營山，甚急。遇春遂由靜邊寺追攝去，而屬渠縣廩生廖元瀚等於林壩場西集鄉勇以防河。晨忽大霧，舉目無覩，惟聽江流黯淡如戈馬聲，而添德、光祖、包正洪等賊騎數萬已偷渡渠河。元瀚與同縣鄉勇二百餘人俱戰亡。渠縣婦女原任廣東高明令雷際泰妻劉氏聞賊至，攜子婦並二女避於林，爲賊蹤跡。劉氏曰：我老當死，子婦及女乞全。

之婦與女亦請於賊，願死鋒下，以代母。賊先殺其母，婦女三人大聲號痛且哭，且罵。賊復殺一人以懾之，其二入罵益厲，求速死，並戕焉。包正洪旋掠蒼溪，貢生韓宗愈並文武生監及婦女死者又數十人。○二月，副都統德追賊徐添德等及長壽雲台舖，先一夜賊攻官軍營，不爲動。明日整兵與戰，正酣，叅贊額及賽冲阿率馬隊橫衝之，萬蹄騰躍，戰塵蔽天，賊大敗，屍橫遍野。再追及平井舖，商賈百餘家悉避匿。賊被追急，乃詭以賊婦僞據市肆，具酒烹茗以待。官軍前隊至，正飢渴飲食之，伏賊起，邀之綏寧外委楊泰等死焉。黨內有賊首

張永受達州九經坪人也。率醜類欲回故里省墓。副都統德  
追及大敗之。永受走太平。時守備桂涵、羅思舉於雲台舖、雷  
音舖等處俱率鄉勇以從。至是追及鐵鑛壩。兵始交。鄉勇鼓  
譟而前。又敗之。透迤由舊縣壩、井溪壩。且追且戰。俘馘纍纍。  
餘賊竄至開縣白橋。招集黨類。知追兵且至。伏馬隊於橋之  
左右。而整衆橋東以待。副都統德望之曰：「此有伏也。」令桂涵  
羅思舉抄其左。他將擊其右。自率中隊三路齊發。賊大敗走。  
直追至雲陽江口。幾無遺類。而冷天祿、王光祖等自渠縣入  
南充。未至之先。南充民日夜相驚。牛犬無故自鳴。倏一騎警

過。首蒙白帕。挾長鎗如飛而去。食頃連過數騎。俄而添祿等  
大衆至。蓋賊之來必先遣迅騎爲前導。賊中稱探馬頭是也。  
凡探馬到能射殺一騎。則他騎皆反走。以爲不利。賊衆卽從  
別道去。否則席捲蜂擁而來。其常態也。邑武生趙輝等率團  
勇數十人禦於溪頭壩。被執死之賊轉掠儀隴。上年羅其清  
據巴州大鵬山。諸帥連營圍攻。其清遣羅三羅入蘇應從等。  
夥賊剽儀隴。阻絕官軍餉道。經總兵楊遇春敗散。幾就撲滅。  
遇春調回大營。賊無忌憚。轉肆焚掠。添祿等復與之合。愈  
熾。儀隴監生何慎修等百餘人禦賊死。而張漢潮黨忽犯夔

州都司劉忠魁、千總薛積善、馬應舉、外委曹昌新、向天祿、陣亡奉節婦女李全香、妻田氏等五十餘人、不屈死、賊走巫山、婦女王昌福、妻蕭氏等殉節、時副都御史廣興如達州、辦理軍餉、欽加道銜忠州牧劉青、協辦嗣因各路籌邊及出入支銷事務浩繁、於簡發府道中添派四員、明年副都統托津復馳驅來川、總理儲胥、是時各省軍帑已糜七千餘萬、有奇、民間津貼不與焉。○三月、叅贊額、斬賊首蕭占、峒、張長庚、初包正、洪竄渠縣一帶、楊遇春追敗之、占、峒、長庚由閬中襲官兵、後叅贊探知、迎擊之、游吉、喜明等敗之、於駱市橋殺七百

餘人、時叅贊額病初愈、即追至右峩山、朱射斗由雞喉塞抄出夾擊、殺千餘人、賊匪全隊奔上譚家山、叅贊督總兵朱射斗、楊遇春、叅將劉瑞、游吉、喜明、防禦全保、前鋒安楚、拉藍、翎領、催彥、畢勒、委官訥言、登額、倭、枋、泰等、乘夜啣枚登山、殺賊六千餘人、占、峒、長庚為亂兵所殺、墜岩死者二千餘、擒賊目王宗元等八百人、餘匪走合冷、添祿被脅赴營山、縣投首者甚衆、釋給銀米、遞籍安插、林亮功已於二年八月、鎗斃、開縣白岩山、而我軍叅將孫大猷、守備陳凡、丁洪俱陣亡、或曰長庚後降於雲陽、老死、蕭張二賊之由閬中而出也、朱射斗



合場遇春擊之賊驚潰而兩鎮之兵諸大帥倚爲左右手每急數百里外必調赴因未及殄淨被檄去於是而戰長壽戰達州戰太平開縣晝夜奔逐無暇兼顧二賊復熾駱市橋未戰之先閬中狼籍庠生馮朝佐等率鄉勇數十人戰歿叅贊額旣勦蕭張二逆添祿與賊目符日明乘間竄掠岳池一帶令偽元帥劉潮選領衆先行叅贊間道冒雨進追及悅來場賊尙未覺潛派總兵楊遇春左右抄出而令湖廣提督劉據人頭堰以待自統大隊中路擊之戰始合侍衛噶喇領馬隊從旁迎出四面乘之添祿爲川省首事巨賊最悍勇曾與他

帥相持年餘而莫可如何知遇春至聚驍騎來決死遇春令善射者大呼直前賊辟易添祿中箭死潮選日明率潰卒狂奔欲出大竹縣與包正洪合額叅贊卽於十一日率楊遇春等邀擊於石筍河賊正喚渡官兵三面而來擒斬千餘淹死無算斬符日明惟潮選軼去而副都統德追賊至江口賊走香坪桂壩官兵追至奉節縣之七星橋時黃號賊首張漢潮由湖北至夜攻官軍營垂破而天曉副都統嚴隊而出賊駭退逐之至大寧母猪灣漢潮回戰大敗守備桂涵羅思舉等各擒斬賊百餘名徐添德張永壽乘官軍追漢潮因遠颺○

四月參贊額急追賊走太平縣仙女池新開場地多老林溪  
嶂深峻飛輓過艱軍士頗有饑斃及自縊者而賊深入老林  
無從覓食餓死尤衆時久雨泥濘老林冬雪未化賊凍死者  
與餓死等蒲州副將關聯陞游擊冶正恩把總會守忠俱死  
賊張子聰屯開縣冉家溝掠柏橋縣民楊世祿集鄰人禦之  
夜不辨賊多寡潰匿於碣妻顏氏以祖母姚病不忍棄負避  
園中賊殺姚氏顏罵曰死狗奴官兵且至死無日矣賊怒殺  
四十餘刀而死○五月參贊明追湖北賊首樊人傑至開縣  
戰於四方山賊先伏林中官軍至伏起失利游擊譚公義守

備朱映堂死之總兵楊遇春分追張子聰戰大黃山再戰周  
家溝擒斬二百餘人賊遁楊家山與他匪合層層埋伏馬步  
相間我兵深入重地四面皆賊軍士有懼色遇春揚盾疾呼  
躍馬先入酣戰三時斬賊千人擒馮元係樊人傑龔建餘黨  
欲由太平走温塘井值張子聰狼狽求救趨楊家山投之竟  
大敗而子聰軼合冉添元綽號掃地王於竹峪關勢復振遇  
春馳追入陝千總虎正江戰歿○六月賊黨多聚開縣一帶  
總兵朱射斗與賊首包正洪等屢戰九龍山等處賊復折向  
鷄鳴寺雪寇山射斗迎擊於謝家坪十六日賊掠食厚葉溝

射斗疾邀之殺七十餘人擒莫以才等十三人安阜藍翎外  
委楊林戰死三日追至小茅坪賊依山面陣射斗督桂涵羅  
思舉三面圍攻之追奔二十餘里及蘆花嶺疾圍包正洪鎗  
中左乳死殪賊四百餘名投出男婦五六百人時難民見脅  
從罔治之膽黃散出三四千人有被脅之趙耀宗馬紹述周  
昌倫殺賊自龔幘發李雲飛徐必勝投獻

上諭從前招撫脅從據勒保奏教匪探馬所到將膽黃告示揭去  
以致解散無多勒保於難民內擇其明白勇敢者密帶告示分  
投傳播散出者已有四千餘人其殺死賊目投出之趙耀宗等

獎給八品頂戴所辦甚是再據松筠奏藍號賊由寧羌竄入南  
江自已與白號合前於白號竄入南江時即諭勒保於雲貴廣  
東新到兵內撥派截勦今該處何員帶兵查明具奏欽此賊徐  
添德下湖北數月忽自湖北回川竊窺夔府營於蓮花池提  
督七總兵朱射斗督兵勇往攻之賊大敗賊首王光祖走死  
羊耳山降出數千人獲偽元帥李某守備桂涵諭之降縱歸  
賊營令招其黨李去不得隙後至巴州爲參贊額所困乃率  
數百人出給以軍裝列前茅於是降者日至賊勢遂衰李後  
爲太平游擊添德仍走湖北時賊首包正洪之弟包三竄入

大寧之尖山坪○七月副都統德總兵朱射斗擒線號首逆  
龔文玉偽元帥龔其位提督七擒偽先鋒卜三聘文玉在夔  
州一路爲傳教總師以弟其位爲偽元帥三聘爲先鋒糾衆  
萬人與龔建張添倫辛聰等屯聚大寧巫山之交入石坪副  
都統德與朱射斗期由大昌進自率兵由寶塔山進初八日  
抵大寧賊掠食鹽塲副都統德追至石坪敗之會射斗抵大  
昌十三日午夜合進至川埡子山下督兵仰攻突上黑虎廟  
山頂可俯視八石坪射斗與賽冲阿由三义梁入攻賊寨破  
之殺八百餘人擒賊目徐正明等六百人偽先鋒姚先廷探

馬頭張宗泰棄械投順先廷發夔州安置宗泰請隨營自効  
因告曰文玉收集餘衆欲赴湖北竹溪與徐添德合請亟追  
之副都統德因令賽冲阿等由雙橋進發自由老木孔小道  
疾趨湖北界截其去路賊方食而賽冲阿馬隊突掩之賊跟  
躡遁瓦房灣官兵夾擊擒文玉及探馬頭張尙幘先後斬獲  
千四百餘名龔其位遁搜山兵勇並文玉之妻子獲於香冲  
嗣提督七獲卜三聘之長子正順於林及子女四名越二日  
並獲三聘是役我兵壘溪外委袁龍督標千總吳鴻泰曾益  
把總陳倫外委沈卓戰死○八月提督七督桂涵羅思舉等

自楚蜀界追樊人傑及開萬之交戰徐家壩又戰貓兒寨共斬五百餘獲阮惟明等二百餘人其戰開縣臨江市也官兵乘勝夜入賊營守備桂涵千總楊富貴鄉勇桂直諫於火光中見衣紅氍毹賊奔下山溝知係賊首馳縛之卽龔建也涵擢都司吏部尙書魁倫如蜀逮經畧大臣勒保入都因徐添德一股數千人不卽勦除仍奔竄入楚也維州千總徐恩建昌外委劉殿勳戰死隨朱射斗追高二馬五也

上以勒保經畧半年弗藏厥功又有賊衆入楚之奏以副都統額勒登保加都統銜爲經畧大臣副都統德楞泰爲叅贊大臣尙書魁倫署四川總督內閣學士廣興副都統托津代副都統銜福寧接辦糧餉成都將軍觀成亦緣事解任直隸古北口提督世襲誠謀英勇公阿迪斯爲成都將軍○九月總兵朱射斗追冉添元至菴家山晨起自率勁旅追賊大隊將及適曉霧冥濛令守備張鳳翥殿後賊先伏數十人於林後隊至抄之鳳翥陣亡射斗以偏賊大隊不能回救建武外委王祥元亦戰歿賊將走東鄉太平朱射斗追至開縣柞井壩總兵穆克登阿率兵由東鄉來合戰於涼風埡克之都司桂涵奮追數十里至關口坪賊窮且見追兵少整隊回鬥涵獨與

數騎左右衝賊圍數十重戰四五時官兵大至接戰又移時賊乃潰入老林非涵素勇幾不免○十月賊樊人傑屯開縣楊柳池初徐家埧等戰人傑走免總兵穆克登阿率桂涵等由臨江市乘勝直抵其營殺賊數百人先是降賊李姓者告都司涵曰賊散據各縣者無不願降但懼死苟以一書曉之可勝十萬師涵乃令義兵向仲青賞書往諭時沿路皆避兵鄉民碭砦往來皆斷見仲青欲往賊營疑爲賊縛入碭將殺之仲青語之故民曰吾輩屢被紿受禍酷矣汝事在疑信姑不殺然斷不可往前路必以汝爲猾賊伎倆不汝活矣書訖

不得達是月把總廖榮馬漢章外委王增田自貴戰死○十一月賊首王登廷掠於通江東君壩總兵穆克登阿會同阿哈保督桂涵羅思舉馳及乘夜斫其營時賊號松柏二字官兵以人和字爲號戰賊營中一夜賊號忽亂自相蹂躪死者無數獲賊帥王文奇登廷負傷而逸至南江縣爲鄉勇詰獲登廷達州石亭舖人本未習教因州役妄挈其叔學禮衆憤遂反至是戰敗隻身藏岩間冒作難民云賣布姓張遇劫賊受傷出覓食被執冉添元自關口坪奔竄蒼溪人頭山山頗險經畧額率總兵楊遇春阿哈保三面圍之添元從山壓下

官軍不得地，廣東兵在前，力聞多傷。雲南游擊張明死之。楊遇春以數十騎與賊衝，先合於近山結營，成而日暮。諸帥遠却，遇春亦退。登山入營，乙夜賊四面來攻，蕪草炬擲山下，照耀如晝，以勁弩射之。終夜飛鏃有聲，矢垂盡而曉。賊遁，總兵阿哈保、楊遇春追及巴州。天微雨，賊屯陰背場，官兵分前後進，賊盡殪。追至方山坪，又敗之。時朱射斗與他賊戰於大寧之毛坪，失利。○十二月，官兵與賊戰於貓兒壩，次日再戰。青字壩，敗績。叅游都司多死，臨沅鎮游擊盧陳謨、督標把總彭國仕、千總胡起、萬袁啓貴、外委陳寬、武舉署千總馬定衡等死者數十人。

上諭額勒登保此次盤獲王登廷與所奏貓兒壩官兵挫衄之事，相隔僅止數日，若從前統兵之人，必將官兵失利，壓擱不奏，轉將首逆作為打仗擒獲，掩敗為功。其陣亡多員，分作數次含混入奏，以為支飾之計。前此積習實堪痛恨。今額勒登保並不稍存諱飾，而登廷就獲亦復明白聲叙，係該州縣及鄉勇之力，並不攘為己功。似此方不愧經畧之任，軍營統兵大員原在調度合宜，用人得當，不拘何人能將首逆捕獲，即屬主帥之功。豈必親手擒拏始足著績。且主帥於何人擒獲，即指明入奏，不沒其

功則將領必人人用命，倘將他人勞績攘爲己有，又有何以勵戎行而示獎勸耶？額勒登保不但於將士勞績能秉公辦理，卽爲伊繕叙奏摺之胡時顯能體卹公忠之意，據事直陳，不染謊報惡習，亦堪嘉許。又勝於從前捏寫假摺之章京百倍矣。朕中心獎許，非漫言也。但摺內賊匪業已窮蹙，一語似尙非確果。賊情窘迫，無衣無食，當此冬令，近寒必至，凍餒就斃，豈能用計繞至山後攻撲營盤哉。

上諭地方義勇鄉民隨同打仗出力，上爲國家敵愾，下爲鄉里保障，其中有不顧軀命力犯先鋒，並身陷賊中，抗節不屈者，以小民而能激發於義憤，志切同仇，深堪嘉憫。若不據實上聞，加之獎賞，則鄉勇等殺賊既不叙功，徒死亦無贈卹，似此漫無勸激，伊等豈肯用命？甚至被賊裹脅，轉爲賊所用，亦未可知。前此松筠奏請加恩實爲得當，從來軍營中未有奏及者。又

諭教匪初起，未有若是之多。緣地方官辦理不善，激成事端，蓋邪教之罪與叛逆殊科，乃因奉文拏緝，公差四出，暮夜提人，以致人心逼迫，變生意外，正犯賄囑潛逃，將村庄富戶竄名其中，妄挈考掠，藉此詐索，輾轉牽連州縣及胥役視挈邪教爲利藪，台灣林爽文、達州王三槐，未必不由於此。將來賊平之後，如此等



邪教但當治以本律不可指爲川楚餘匪卽現在從賊中逃出者當遣還原籍或有以其曾經從賊挾嫌告訐州縣當秉公聽斷亦不得以川楚餘黨妄行處治

戡靖教匪述編卷五蜀述

石香村居士編輯

五年正月經畧大臣額領兵赴甘肅以四川軍務交署總督魁於達州賊黨藍號僞元帥冉添元白號僞元帥張子聰線號僞先鋒陳得俸黃號賊首徐萬富青號賊首趙麻花汪瀛等五路之衆合數萬人流轉剽忽聚於合州轉掠定遠縣時正月十五鄉民於嘉陵江干演春燈慶元夕防江鄉勇寥寥且畢趨劇場賊八九人闖至適空船泊東岸賊轉舵過江見無兵守復渡數十人登岸大呼劇場奔潰大隊飛槳而過四出

焚掠火光二百里不絕，累脅至十餘萬人，其方過河也，擄人不殺，皆懾以爲兵。至七間房地方，民多逸，復日以殺人放火爲事。定遠縣庠生夏傳惠者，年六十，父年八十餘，俱被執，令棄父同行。傳惠曰：「死耳。」父子遂同遇害。鄉民楊秀彩負其八十之母謝氏，並携幼女出避。遇賊，女投水死，秀彩與母俱被殺。申萬年七十六，携家避賊，擄其二女，殺其一，孫萬挺戈鬪死，顧長松父母俱老夫，婦負以逃，賊追至其父，嘆曰：「我兩人昏邁，母以累兒輩也。」投水死。長松夫婦大慟，與其子女一家九人赴水死。江西吉安人曾明秀，賈於定遠，母年八十八，卧

病垂危，明秀守母不去。遇害縣婦女庠生鄒占魁妻李氏等，不辱死。羣賊剽至西充縣，庠生何荷文等五十餘人禦賊死。婦女謝忠謨妻李氏等二十餘人，不辱死。有一婦，賊至不及避，匿被獲，艷其少艾，欲辱之，婦堅拒賊，怒斷其首，棄溝中，賊去，頭忽自接，婦得活，但首微偏，頸有赤痕一道，後享遐齡，人多見之。賊犯蓬溪，貢生薛瑞生、員衛岱雲等被害，賊衆風馳電疾，突圍蓬溪縣城。時總督魁屯獅象山，檄總兵朱射斗速援射斗，領兵千餘馳千里，寡行速，人馬汗喘，不得息，且勢孤無援，至高院場，直入賊營，賊四集雲合，圍數十里，官兵力

甚立季國功績  
二  
鬪連發大礮賊伏地而進礮擊不中危甚旁有小寨尙未樹  
柵射斗且鬪且上圍益厚知不濟力鬪又數十人而死兵勇  
幾盡脫者跳躑人叢馳百餘里始免蓋亦不一二焉時正月  
十九日也射斗貴州貴陽人從征緬甸受傳忠勇公知撫下  
素有恩惠邪匪之變戰績最着爲賊所憚者額勒登保德楞  
泰楊遇春及射斗數人而已射斗旣死兵民無不喪氣守脩  
母之慕把總劉映魁外委曾玉柱俱死成都將軍公阿迪斯  
四川提督七十五先後被劫叅贊大臣德楞泰自陝入川勒  
保釋罪以藍翎侍衛爲領隊大臣馳驛赴川協勦旋署成都

將軍於是官兵俱過嘉陵江而東方無兵徐添德湯思蛟之黨  
肆虐川東州縣焚掠民居壯者藉以爲兵老弱殺之間有家  
人來贖則一人須馬數匹東鄉縣民桂思賓者父天柏被擄  
思賓痛其父以馬二匹往贖賊喜釋其父留思賓於營飲之  
酒適有所識婦人在擄中呼曰桂軍功救我逆黨聞其曾以  
擊賊得功也以火匪圍徐燕而死賊之酷多類此○二月賊  
渡嘉陵江後巽脅日衆由劍州之元山場向彰明江油西竄  
接應甘肅之賊叅贊德由廣元疾馳出江油之重華堰箐林  
口據龍安要路賊黨攻破烏龍寨游擊馬元德卓和把總陳

啟珠戰死民請救兵至敗之五路賊衆俱集白家坵屯連九山叅贊德令衆曰賊勢方盛不挫其鋒西川危矣期今日戰敢退者斬吾亦不復反顧及戰賊張甚叅贊曰不足破也馳之官兵共奮有蟒袍草帽戴花翎賊首二分頭督戰官兵馬隊擊其一縛之一中箭退復有花翎賊目中鎗落馬卽曳去乘勢轉戰至新店子賊伏起饗冲阿温春等俱彼圍叅贊救之圍解生擒者線號陳得俸箭傷者藍號再添元中鎗者添元之弟添恒號四元帥俱渡江五路著名首逆也賊敗去棄大礮於新店子池中民趙廷文稟報撈獲西川之無恙賴有

此戰賊走彰明縣義民蔣聯才等戰死婦女張朝陽妻李氏等殉節賊擁衆擾南部署令王贊武死之贊武貴州普安人以舉人授峨眉令有政聲復從征廓爾喀委權南部和賊犯蒼溪近南部界贊武親詣賊壘一圍卒控馬一僮執南部縣官旗前導賊嚴陣以待贊武直入賊首包正洪曰青天何爲至是率衆羅拜贊武諭之降不從令千人護擁出營賊卽撤去是月賊及縣之花牌坊語鄉人曰爲我告王青天不敢犯父母聊假道贊武曰賊敢以甘言餌我乎以城事屬同官自率鄉勇二千人往贊武奮前衝突戰竟日退休富村驛俄

賊大至與邑舉人李紹先生監職員向遐齒等俱戰亡婦女  
殉節者亦數十人叅贊大臣德由老童急趨洛陽橋山頂攻  
破關耳梁屯聚之賊復追敗於黃蓮壩擒探馬為林遂分兵  
四路由得勝山各隘口進攻擒偽先鋒楊正明陳欄斬旗  
手陳會張元獲賊崔文林等百餘人聞賊大衆聚馬蹄岡總  
巨數山遂遣兵伏山後仍四路分兵賽冲阿等攻包家溝阿哈  
保等攻火石壩温春等攻龍子觀叅贊督大隊直趨馬蹄岡  
賊冉添元等分兵八路迎拒棄馬步戰人執樹枝一束箭來  
則左右麾凡戰三晝夜鼓聲振地烟塵漲天賊兵多更番休

息我兵饑渴甚垂敗守備楊春和戰死叅贊下馬示必死  
兵益奮復上馬單騎大呼馳冲賊陣中堅將士鼓譟從之山  
後伏兵隨起賊陣亂自相蹂躪殺聲大起冉添元馬跌下澗  
蘇爾森射而擒之賊大潰獲偽總兵鮮其順殺旗手唐士林  
探馬頭蘇如富劉文富等數百人初將戰添元謂其黨曰官  
兵在川者惟德某可畏且日戰退一步者斬我不擒德某必  
德擒我故賊衆皆致死無一敢退論者謂賊自起逆以來以  
此戰為最○三月賊自馬蹄岡敗後竄劔州李家坪土廟子  
楊家壩火燒寺叅贊德乘勢直抵石門寨相度形勢密遣兵

勇由溝右繞上縱入西角寨門坎開木柵殺賊千餘墜岩死者數百擒偽總兵李斌偽先鋒旗手探馬頭董廷華等十七名及活賊八百餘人馬驟器械無算初賊於李家坪等處誘官兵來追先設伏石門伺半衝截官兵自李家坪至關廟埡遇賊數千不戰而走叅贊笑曰此誘我也先擊其寨寨極險屯弁森格爾甲躍入手刃數人兵士鼓勇斫開木柵鎗礮齊舉都司羅思舉手擒賊七十餘人賊陳得俸妻郭氏着白衣旗上大書替夫報仇並正法被擒及逃出難民極多不能悉給路票惟以一旂相率遣歸蓋自冉添元被擒賊懲前敗無

鬪志也餘賊四竄梓潼彰明諸境而張子聰汪瀛等聚敗衆晝夜狂奔轉剽遂寧等縣竄至安岳民男婦多死捐職布經歷蔡齊巍奮袂而起率庄農五十人持械出城慷慨赴敵手刃數人賊四圍擗矛刺之遇害初邑令楊道南遍諭縣屬立寨自固二十一日賊由遂寧至焚通賢場夕抵姚市鎮距城五十里道南屬邑紳汪鳴韶王應鵬率民兵登陴守禦次日賊至流湖場又明日至魚棧灘圍勇紀羅漢殺一人舉人吳子超之父朝貴及鄒開岳等皆遇害安岳道林寺鉅刹也避賊寺中者五百人僧慈鑑年七十有膽識督令匿寺後賊至慈

鑑往說賊喜去且遺之牛數頭銀若干鑑訪牛主歸之以其銀雇人掩沿路兵死鬪骸焉賊擾樂至縣歲貢生唐世勳等死難賊張子聰等驀渡潼河先是嘉陵江口之定遠縣潼河之射洪縣俱有兵勇防守主帥爭撤以自衛及賊至潼河渡口太和鎮又不預檢船艘故賊所至如無人之境至此去成都不三日省城始戒嚴恭贊德既屢敗賊追至鹽亭縣翼前有潼河爲阻不料兵去船留二十三夜二鼓後賊數騎乘夜昏潛渡見無一卒只殘弱鄉勇數十遂大叫殺人鄉勇驚潰時江水未漲羣賊牽挽聯絡亂流而渡殺聲震地火光四起

太和鎮民商萬家不知所向惟坐以待斃焚掠慘矣千總冉斌率鄉勇千餘往禦離鎮二十里於千子墳賊重重圍之斌及衆無一脫者射洪縣令張明燮聞賊逼懼而自縊縣庠生張千鎰等戰死及鹽亭縣增生黃文朗等並妻子俱死難賊自渡潼河後大熾恭贊德由太和鎮星夜追躡知賊屯新店子分攻成谷大和仁和仁義諸民寨恭贊以爲先破賊巢則寨圍自解分兵三路直搗其巢大破之奔打銅壩復擊敗之乃紛紛向天星橋而循是役殄首逆雷世旺及孫老六乃襄陽掌教賊皆聽其號令統計殺賊千餘人擒亦如之四寨之

民數萬賴以免賊至中江縣民婦被難者百人旋走金堂縣簡州牧毛大瀛恐竄入州境率汎舟馬應魁督同士民團勇二百餘人晦日至金堂界土橋溝猝遇賊大瀛應魁力戰歿從死者從九品鍾兆坤監生張士修武生何占魁等七十餘人勒保以四品頂戴授四川總督兼辦糧餉叅贊大臣德楞泰授四川將軍總督魁倫逮問副都統托津通政司副使廣興先後回京

上諭額勒登保赴甘肅以四川軍務交魁倫倫於達州逗遛八日以兵製衣履爲詞復饒道稽延賊遂渡嘉陵江總兵朱射斗失利陣亡奏入予魁倫薄罰諭以防守潼河乃伊生死關頭令其固守以觀後效魁倫素疏懦復撤沿河黔兵賊遂過潼河擾川西故程審賜自盡失律之臣不誅奮不顧身者何勸豈有數萬子民血膏原野骸骨拋零爲君父者漠不關心必欲曲法保全一僨事庸臣之理宜示中外知之○四月賊渡河後分兩路藍號冉添元死餘賊竄射洪西充鹽亭閬中一路總督勒追之百號張子聰等竄安岳中江樂至綿州叅贊德追之與賊轉戰至黃鹿鎮賊遂迤集山上叅贊分左右翼挺槊大呼登山數戰皆捷降者五百人擒斬過倍躡至綿州豐谷井河邊賊前



甚立考目文  
隊已渡尚餘三千人疾逼之殄馘殆盡餘悉淹斃救出難民  
八百餘人概給鹽米路票釋回綿州婦女庠生安啟基妻李  
氏等殉節賊犯三台三等達阿哈哈番世職廣西義寧協副  
將羅定國前天津縣典史譚正龍茂州外委廣福榮生員李  
廷泰張啟元張啟廉等死之廷泰以父病不敢逃父子遇  
害有黃通鑑者與賊格鬪刃刺其喉尸立三日不仆楊龍壽  
者據小橋與賊鬪半日賊不能過從他道躡其後乃死白號  
賊屢敗後折竄潼河之東欲與藍號賊合總督勒敗之黃蓮  
埡叅贊德敗之於觀音寺又敗之於陳家渡龔家灣初八日

賊合於江口柳樹灘正渡嘉陵江叅贊兵乘其半渡擊以大  
礮船皆碎在岸者又蹴殺淹斃數千人陸續投出被脅者尤  
多獲騾馬器械無算夾岸兜擒賊目柳凱等八百餘人潼河  
東西一律肅清川西無恙德叅贊之力也時襄陽白號高均  
德餘黨賊首高二馬五出龍安一路總督勒遣總兵薛大烈  
與戰於鐵籠堡敗之擒賊將董大榜張子振等三十八人斬  
三百人賊遂竄於沓地而川北昭化川東鄠都俱有賊○閏  
月賊由沓地老林內出總督勒遣薛大烈及總兵施縉都司  
保德等率兵禦之大烈分兵由北抄其後未及縉驟前與戰

兵少不敵與保德力戰陣亡軍士多死大烈疾馳安縣賊走甘肅之交大烈偕阿哈保追之日馳百餘里不見賊至喬庄賊屯山下于是大烈營山右阿哈保營山左都司桂涵率鄉勇百人馳之賊震退官兵不繼賊反攻兩山軍潰入林會天晚微雨賊撤兵還潰卒從林中稍稍聚集突出截之賊疑中計亦大潰總督勒乃令提督七十五易德參贊旗幟復進有楊土司者預飭土兵伐老林巨木數百株交橫於路以扼賊退提督率桂涵等擊賊於黑河賊見馬蹄岡旗幟驚走官兵追擊前路已塞擒斬過半餘賊向甘肅文縣而逸外委謝玉

貴平武縣生員王黠並婦女百餘人被戕賊高二馬五等犯松潘突三舍堡紅岩關新正堡武生徐尙書等被脅不從死賊首汪瀛正法徐添德起達州時汪瀛由探馬頭爲北路總兵後與王登廷合登廷被擒青號匪衆推瀛爲元帥偕藍白黃線號等賊竄渡嘉陵江節經官軍勦殺于漩河口棄馬隻身兔脫是月瀛聞大營招運糧夫欲探同類更名汪升入營投充達州人蕭文魁指日檻送成都設被害文武官神牌凌遲剖心致祭○五月參贊德擒僞軍師何上達磔之上達達州人習六壬遁甲爲賊軍師擄人歸其總管壯者充戰子餘

殺之今年三月上達等擾大竹縣逼城下邑令張位中慨然  
曰春耕不得坐視民死乎督把總王耀龍及團勇出戰俱遇  
害從死者百餘人城內民繼而下奪尸還上達等遂分竄江  
岸窺伺大江涪州鄆都長壽江北廳皆告警賊知官兵將至  
向西北折竄叅贊自隣水縣冒雨迎擊於秦家埧七孔溪屋  
拱橋賊屢敗並擒上達問奚為殺官云占得好課戕官乃利  
叅贊令繕位中神牌委員寸磔以祭位中江蘇上海進士也  
藍號諸賊剽通江入南江屯長池埧圍知縣裘良駿於李良  
寨分攻羅台元山等寨叅贊移師往勦時久雨料賊帥必不

親攻寨洞直搗長池巢穴賊不及防大潰圍寨賊奔回徐分  
兵禦之賊反走追及吳家埧獲藍號偽元帥鮮中青係再添  
元義兒樊人傑封為元帥與再添泗張金蓮賴掌櫃齊惻謨  
同事賴掌櫃亦於是役為鄉勇蘇元林所獲張金蓮於上年  
十一月已授首叅贊德在通江木空河所殲也總督勒議捐  
廉助餉自軍興以來所用餉需皆由部庫內庫發給及各省  
藩庫關稅鹽課春秋二撥源源接濟是月總督勒保奏酌  
議川省歷任總督司道分捐養廉

皇上不准所請降旨訓飭以軍需所用不下十千萬各官所得養

廉不過十四萬以錙銖投滄海何濟於事而徒令養贍無資辦  
公無費紛紛完納尤於政體不協且此等捐項豈皆盡出已貲  
大吏取之州縣州縣取之小民而不肖之員更藉以染指層層  
剝削波及小民官員博助餉之虛名百姓受捐餉之實害甚至  
謂出上意朕不肯爲時閭閻頗有津貼幫費○六月賊首樊人  
傑廣向瑤劉潮選湯思蛟等前分竄陝楚並蜀省各州縣是  
月忽聚太平新寧間總督勒令提督七由營渠而進叅督德  
由巴州江口取道營渠總兵李紹祖及提督七等俱有斬獲  
小頭目賊廣真張廷鳳出降有都司馬良柱者遇賊單騎奔

走頂帽已失團首廖明遠疑以爲賊殺之事破明遠擬徒流  
良柱子孫永不許仕提督七兵至新寧探知馬驛溝有賊卽  
於三更發兵見賊前隊俱係婦女伏林中俟其過突出大敗  
之時高馬餘賊在沓地者復出二道橋武弁增順以兵少引  
退而川東羣賊大熾有分股賊至開縣江里萬家寨鄉勇關  
敗義勇向有桂被擒賊縛而盛諸囊潑以沸湯而死名曰滾  
獅子王銅匠者亦被擒以熾薪刺喉死名曰吞炭

上諭勒保稱賊勢散漫奔竄無常此賊未除他賊又熾調兵未到  
原兵已疲數語於近年情事實已包括無遺○七月總督勒令

提督七及總兵李紹祖等過川東，至寶山關與賊遇，敗走之。提督兵折回隣水，遇賊衆，正移營，遣游擊桂涵伏數里外林莽中，賊過半擊之，擒斬甚夥，獲樊人傑之弟人聰，僞先鋒陳得俸、叅贊德，追賊合州，岳池戰於蕭家場，大勝，擒數千人。總督勒爲後勁，以降賊二三千人付訛，丙夜與外賊通，誤於營叅贊分兵救之，賊又敗。叅贊德、總督勒、殄巴州白號解大川，大川初隨羅其清起事，後與苟文明合，經官兵於岳池定遠、廣安等地，連日追勦，大川竄至儀隴蒿枝碛，典史倪霄督同寨首陳朝會集團勇突出截之，擒僞副元帥吳效古、僞總

兵蘇映昌、先鋒劉映利，明日大川復來攻寨，以銀五百求贖，效古朝會不許，且鎗傷其左臂，大川逃巴州，欲向韓家碛，碛首伊諸父解文芳也，先遣旗手解文屏、楊仕山赴碛密商，文芳曰：大川賊也，吾以爲諸子乎，二人能擒以來者，吾請賞汝功，不然吾殺汝，二人惶恐受命，約爲內應，二十一日夜二更，解文芳率解文欽、解文明、韓毓蓮等百餘人直抵大川營，呼官兵來，大川驚起，解文屏、楊仕山斬之，並繫賊楊昌仕以獻，提督七追白號賊至大竹縣姚家岩，官兵北去，賊忽而來，藍翎軍功汪瀛先進死之，大兵馳及戰移時，兵勇奮前，賊敗數

十里時稻田正茂賊擁田中爲稻莖所藉獲幾盡叅贊德總督勒合勦樊張解苟匪衆于小米溪白沙河賊紮小米溪白沙河叅贊由望水垣龍市鎮躡追總督由草街子元口鎮抄出兩軍夾擊斬僞總兵吳國耀解大川之叔僞先鋒解文炳擒大頭目苟文禮大掌櫃劉崇照旗手張文元苟文經王綬旦及羅士虎等殺三千餘人投出難民三千五百餘人總督偵後路飛龍場有賊急飭薛大烈勦之斬賊首趙文舉獲旗手郭萬福○八月叅贊大臣兵抵太平賊匪度向瑤劉潮選趙麻花等經總督勒擊敗後奔走長堤渡河叅贊與總督合

軍分佈將領連日追勦提督七於豐城寨及大團包等處殺賊五百餘名總兵薛大烈于茅坪殺賊三百餘擒百三十名叅贊遣總兵溫春賽冲阿等與總督前隊薛大烈合擊於倒流水殺賊七百名擒賊目男婦四百六十名斬僞副先鋒湯思蛟之兄思舉及僞總兵王三魁太平團勇斬賊首唐大信初大信與張子聰合于干江河一帶游奕屢擾付近居民碕寨有白水碕者囤積兵糧賊時覬覦寨首龐黯然恐爲賊劫策先發於二十二日潛商各寨率丁壯團勇五百人乘夜起賊營正酣飲歌舞猝掩之殺賊百餘自相蹂躪通夕翌日逃

出難民馮萬景告是夜唐大信中鎗昇至甘龍礮死餘衆擁  
李顯必爲元帥屠牛祭旗期報復明日攻寨已有備復敗之  
向後烟山黃溪河遁旣而叅贊德總督勒分路追勦前後復  
殺僞總兵胡之魁擒湯思蛟之弟賊首湯思川探馬頭阮正  
剛僞先鋒陳元旗手黃之華等共擒斬八百餘名餘走東鄉  
縣千總宋廷柱王廷耀外委楊占龍死之○九月叅贊德總  
督勒駐軍紫水坵賊趙麻花從大寧老林由香坪桂坵一路  
勾合青號賊匪折回太平官兵冒雨自江口渡河迎之值賊  
由寒池坵向大水田竄至叅贊迎于溝內總督兵由右山壓

下賊覺奔馬鞍山倚險爲陣官兵乘未成列突上山頂賊潰  
入箐林是夜將士露宿林外黎明入林搜捕趙麻花衣紅額  
倫袋率殘匪東逸四川步兵何有富追斬之並獲其妻張氏  
麻花名昌應徐添德之徒於汪瀛死後始稱元帥來大水田  
迎其師云並擒頭目李思印林仕純僞總兵何崇信麻花死  
後王柵向雲陽高陽開縣奔竄官兵追至大茅坡賊正造飯  
亟擊之敗於磨子岩訊俘賊鍾應鼎知王柵於濫泥溝帶箭  
不能行被殺餘衆竄入八廟橋爲新寧縣保全寨圍勇截殺  
至觀音壩擒旗手傅有萬及王柵之師李思槐衆稱四老師

傳者此路首夥肅清時忽有賊首朱九齡由陝闖至東鄉之平溪埧知縣徐廷鈺督團勇軍功郭俸等殺數人亦有落溪死者而張添倫之餘黨竄入金溪河者團勇亦截殺百餘人擒首逆魏超巴州元山寨團勇亦敗賊伍家河益碕寨固銳賊愈耗矣黃號徐萬富由巫山竄入湖北○十月楚省藍黃白線四號入大寧李炳卽李彬陳潮觀並陝省張齊辛等賊由南江折入高家營顏楊二賊由西鄉入太平龍紹周等與唐冉餘逆由紫陽折回太平又有大隊賊由楚之房縣掠至巫山提督七率游擊羅思舉等敗於南埧場又追及三溪子復

敗之時薛大烈亦敗賊於通江之貴門關及達州之喬旺河而東鄉白號僞元帥張子聰與其黨李德先不睦欲走合唐大信聞大信死又欲投湯思蛟思蛟亦被官兵擊敗子聰兵皆逃遂假爲難民求乞潛竄至開縣在籍訓導陳希武及團勇彭朝祿詰獲獻忝贊嚮之○十一月叅贊德殲楚匪白號賊首楊開第齊幗謨賊齊王氏于湖北敗死餘黨推其夫兄齊幗謨爲帥楊開第兄開甲被戮亦自立爲帥與李炳等合復屢擾川陝之交因棧道有兵防守川東北團寨謹嚴無可擄掠議渡嘉陵江叅贊迎之巴州渠縣戰於安仁溪再戰騎



龍壩再戰巴州之兩台山再戰於官陞寨高山旺且戰且追  
晝掩旗鼓夜宿低坳以乘不意而經過之雷成寨插旗山九  
嶺寨各團勇俱下堡助戰殺數千人斬首逆齊幟謨于官陞  
寨斬楊開第於柏林場擒偽總兵熊魁元先鋒苟文忠李炳  
子少元帥李潮坤偽總兵王得紅陳文楊開第之師金幟明  
副元帥馮中謨惟李炳王勝可魏棒棒遁投陳潮觀而賊首  
符大成紮開縣扇子山久不見官兵益無忌游擊桂涵率鄉  
勇乘不備亟掩之賊聞鼓譟聲登高望見桂涵旗幟即走擒  
斬甚衆涵乘勝追及梁山賊屯養白渡桂涵間道躡至賊益

不防兵來之速也涵乃鳴鼓而進賊衆膽落全數殲盡獲符  
大臣時參贊德率馬步由棧追賊入陝○十二月李炳等餘  
孽由閬中巴州奔竄參贊德總督勒提督七分三路截殺擒  
斬五百餘人賊辛聰由陝折入廣元李炳遂與之合而張士  
龍阮正潮陳潮觀等遁入老林開縣雲陽復有大賊外委楊  
占龍戰死巴州太平亦有零星賊名摸樁賊地方團勇捕殺  
三百人開縣周家礮有賊攻民寨甚急提督七馳及戰酣忽  
山後鼓聲大震紅旗捲出薛大烈兵至左右環攻賊大潰追  
百餘里擒斬幾盡是戰官軍不約而合竟成奇功李炳陳潮

觀張士龍辛聰顏勝可魏棒棒阮正瀧招邀約集合擾川北而大寧金竹坪又有曰號湯姓藍號岳姓之賊總兵薛大烈羅聲臯桂涵等追勦至徐家埧突遇湖北賊至戰相當而總督以川北賊尤衆調大寧之兵回勦士龍竄入陝初川東北被賊府縣以戎馬倥偬士子歲科兩試暫行停止是時道路漸次肅清順慶保寧達州始請開考

